

**BASES REGULADORAS PARA A CONCESIÓN DE SUBVENCIONES A CLUBS DEPORTIVOS
DA PROVINCIA DE PONTEVEDRA QUE PARTICIPAN EN COMPETICIÓN OFICIAIS DE
ÁMBITO ESTATAL NO ANO 2024**

O deporte é unha actividade esencial, enormemente enriquecedora e xeradora de benestar persoal. Ademais, constitúe un importante instrumento de cohesión social, de transmisión de valores e de impulso económico.

Así, o modelo deportivo español está experimentando continuos e vertixinosos cambios que provocan que cada día máis cidadás e cidadáns practiquen deporte, alcanzando unha proxección na sociedade que dificilmente se prevía hai poucas décadas.

Por iso, é importante facilitar o acceso á práctica deportiva e fomentar a participación en actividades organizadas polas federacións deportivas.

A Deputación de Pontevedra, consciente das dificultades que teñen os clubs da provincia para participar e representar a esta nas diferentes competicións de ámbito estatal, e comprometida co labor que levan a cabo no fomento e impulso neste ámbito, quere promover, a través desta liña de axudas, a participación en competicións oficiais de ámbito estatal por parte dos clubs da provincia de Pontevedra, como unha actuación de interese público e provincial que constitúe un factor esencial no desenvolvemento deportivo e que supón un estímulo para fomentar o deporte de base, ademais de cumprir unha función representativa e de reputación xeral do deporte na provincia.

Desde o punto de vista competencial, no artigo 43.3 da Constitución española establécese que os poderes públicos deberán fomentar a educación física e o deporte como un dos principios reitores da política económica e social.

Na Lei 39/2022, de 30 de decembro, do deporte, considéranse o deporte e a actividade física como actividades esenciais, e que todas as persoas teñen dereito á súa práctica. Neste senso, a lei contén moitas referencias á importancia das entidades locais á hora de promover e fomentar a práctica da actividade deportiva como xestoras do territorio.



Así mesmo, na Lei 3/2012, de 2 de abril, do deporte de Galicia, determínase que as deputacións exercerán no seu correspondente ámbito territorial as competencias para fomentar, promover e difundir o deporte.

Adicionalmente, no ámbito provincial, segundo o artigo 36.1.d da Lei 7/1985, de 2 de abril, reguladora das bases de réxime local, é competencia propia da Deputación a cooperación no fomento do desenvolvemento económico e social e na planificación no territorio provincial, de acordo coas competencias das demais administracións públicas neste ámbito.

Do mesmo xeito, no artigo 109.1 d da Lei 5/1997, de 22 de xullo, de Administración local de Galicia, determínanse como competencias propias das deputacións o fomento e a administración dos intereses peculiares da provincia, e no 118.d, a organización de actividades cuxa finalidade sexa o fomento en materia de cultura, educación e deporte.

Segundo o exposto e ao abeiro do establecido na Lei 38/2003, de 17 de novembro, xeral de subvencións (LXS); na Lei 39/2015, de 1 de outubro, do procedemento administrativo común das administracións públicas (LPACAP); na Ordenanza reguladora de subvencións da Deputación de Pontevedra e na demais normativa aplicable convócase esta liña de subvencións a clubs deportivos da provincia de Pontevedra que participan en competicións de ámbito estatal para o ano 2024, de acordo coas seguintes

BASES

Primeira. Obxecto

Estas bases teñen por obxecto regular o procedemento de concesión das subvencións a clubs deportivos da provincia de Pontevedra que participen con algún equipo ou deportistas en competicións oficiais de ámbito estatal recollidas nesta normativa.

Segunda. Entidades beneficiarias

Poderán beneficiarse desta convocatoria os clubs deportivos sen ánimo de lucro, legalmente constituídos e con domicilio fiscal na provincia de Pontevedra, que contén cun equipo inscrito nunha das competicións oficiais de ámbito estatal establecidas nesta normativa ou



participen con algún equipo ou deportista en categoría absoluta nas diferentes competicións oficiais de ámbito estatal e cumpran os requisitos que se establecen nestas bases.

Non poderán beneficiarse as entidades nas que conorra algunha das circunstancias ou prohibicións ás que fai referencia a lexislación vixente en materia de subvencións.

Todas as entidades solicitantes deberán estar ao corrente das obrigas tributarias coa Axencia Estatal da Administración Tributaria (AEAT), coa Facenda galega, coa Seguridade Social e coa Deputación de Pontevedra, e non ter obrigas ou incumprimentos pendentes, de calquera tipo e non só económicos, coa institución provincial.

Non poderán beneficiarse destas subvencións as entidades que teñan pendentes de xustificar axudas concedidas no exercicio anterior para o mesmo programa.

Terceira. Modalidades deportivas e competicións oficiais obxecto de subvención

As modalidades deportivas e competicións oficiais obxecto de subvención clasifícanse, para os efectos destas bases, da seguinte forma:

- Competicións de nivel 1:
 - Modalidades deportivas nas que a competición de categoría absoluta ou sénior se establece en formato de liga por equipos (con 5 ou máis deportistas no espazo de competición).
 - Con xornadas de ida e volta.
 - Con ascensos e descensos de nivel segundo o regulamento de competición.

(*Inclúese a categoría previa á absoluta na modalidade de fútbol)

Nivel 1-A	
Baloncesto	LEB Ouro e Liga Feminina Challenge
Fútbol	2.ª RFEF Feminina
Fútbol sala	2.ª división nacional masculina
Hóckey sobre patíns	OK Liga feminina e masculina



Voleibol	Superliga feminina e masculina
Nivel 1-B	
Baloncesto	LEB Prata e Liga Feminina 2
Balonmán	División de prata masculina e División de honra ouro feminino
Fútbol	3.ª RFEF masculina e feminina
Fútbol sala	2.ª división nacional B masculina e 2.ª división nacional feminina
Hóckey sobre patíns	OK Liga prata feminina e masculina
Béisbol	Spanish Baseball League
Sóftbol	Spanish Softball League
Rugby	División de honra feminina e masculina
Voleibol	Superliga 2 feminina e masculina
Wáter-polo	División de honra feminina e masculina

Nivel 1-C	
Baloncesto	EBA e 1.ª nacional feminina
Balonmán	1.ª división masculina e División de honra prata feminina
Béisbol	Liga nacional de béisbol 1.ª división
Fútbol	División de honra xuvenil
Fútbol sala	3.ª división nacional masculina
Hóckey sobre patíns	OK Liga bronce feminina e masculina
Sóftbol	Liga nacional de sóftbol masculino 1.ª división
Rugby	División de honra B feminina e masculina
Voleibol	1.ª división feminina e masculina
Wáter-polo	1.ª división nacional masculina e feminina



- Competicións de nivel 2:
 - Modalidades deportivas nas que a competición de categoría absoluta ou sénior se establece en formato de liga por equipos (con 4 ou menos deportistas no espazo de competición).
 - Con ascensos e descensos de nivel segundo o regulamento de competición.

Nivel 2-A	
Bádminton	Primeira ouro/Primeira prata
Billar	División de honra
<i>Bowling</i>	División de honra feminina e masculina
Esgrima	División de ouro (espada, sable ou florete)
Tenis de mesa	División de honra feminina e masculina
Ximnasia	1.ª división da Liga Iberdrola GR e 2.ª división da Liga Iberdrola GR

Nivel 2-B	
Atletismo	Liga de clubs de primeira división feminina e masculina
Bádminton	Primeira bronce
Billar	1.ª división
<i>Bowling</i>	1.ª división masculina
Esgrima	División de prata (espada, sable ou florete)
Orientación	1.ª división de orientación a pé
Tenis de mesa	1.ª división feminina e masculina
Vólei praia	Liga nacional de vólei praia
Ximnasia	3.ª división da Liga Iberdrola GR



- Competicións de nivel 3:
 - Modalidades deportivas nas que a competición de categoría absoluta ou sénior se establece en formato de *ranking* ou clasificación final individual ou por equipos.
 - Incluídas nun calendario oficial da tempada da que resulte o *ranking* ou clasificación final.

(*As entidades deberán acreditar unha participación mínima)

Nivel 3-A	
Ciclismo	Copa de España en ruta elite/sub-23 (deberase acreditar a participación nun mínimo de 5 probas puntuables da Copa de España 2024. A certificación terá que asinala a Real Federación Española de Ciclismo).

Nivel 3-B							
Ciclismo	Elite/sub-23 na modalidade de estrada, BTT XCO ou XCM ou ciclocrós (deberase acreditar a alta do equipo elite/sub-23 na Real Federación Española de Ciclismo e a participación dun mínimo de 3 corredores elite/sub-23 nun mínimo de 5 probas puntuables no calendario estatal, das cales tres delas deben ser fóra da comunidade autónoma galega. Non se terá en conta as probas que non figuren no <i>ranking</i> publicado da Real Federación Española para esas categorías. A certificación presentárase no momento da xustificación e terá que asinala a Real Federación Española de Ciclismo). A continuación establécense as competicións que se poden certificar:						
	<table border="1"> <tr> <td>Modalidade de estrada:</td> <td>Clase: 1.12.1/1.12.2/1.12.4/1.12.5 Clase: 1.13.5/2.13.1 Clase: 2.12.1/2.12.2 Clase: 1.15.1/1.15.2/1.15.5</td> </tr> <tr> <td>Modalidade BTT:</td> <td>Clase: H.1/H/K.1/K/Ku.1/Ku</td> </tr> <tr> <td>Modalidade de ciclocrós:</td> <td>Clase: C1/C2/1.33.1/1.33.2/1.33.4</td> </tr> </table>	Modalidade de estrada:	Clase: 1.12.1/1.12.2/1.12.4/1.12.5 Clase: 1.13.5/2.13.1 Clase: 2.12.1/2.12.2 Clase: 1.15.1/1.15.2/1.15.5	Modalidade BTT:	Clase: H.1/H/K.1/K/Ku.1/Ku	Modalidade de ciclocrós:	Clase: C1/C2/1.33.1/1.33.2/1.33.4
	Modalidade de estrada:	Clase: 1.12.1/1.12.2/1.12.4/1.12.5 Clase: 1.13.5/2.13.1 Clase: 2.12.1/2.12.2 Clase: 1.15.1/1.15.2/1.15.5					
	Modalidade BTT:	Clase: H.1/H/K.1/K/Ku.1/Ku					
Modalidade de ciclocrós:	Clase: C1/C2/1.33.1/1.33.2/1.33.4						
Outras modalidades deportivas	O resto de clubs deportivos deberán acreditar a súa participación con 3 deportistas en categoría absoluta nun mínimo de 5 competicións de ámbito estatal ou internacional fóra da						



	comunidade autónoma galega incluídas no devandito calendario. A certificación presentarase no momento da xustificación e terá que asinala a federación correspondente.
--	--

Estas competicións deberán estar incluídas nos calendarios oficiais aprobados polas diferentes federacións para a tempada 2023/2024 ou 2024.

Poderanse incorporar novas modalidades e competicións de ámbito estatal; o servizo instrutor realizará cantas comprobacións sexan necesarias para certificar o ámbito da devandita competición coa federación correspondente e establecerá o grupo e o nivel que lle corresponda.

Cuarta. Procedemento de concesión

O procedemento de concesión das subvencións levarase a cabo en réxime de concorrencia competitiva; é dicir, realizarase comparando as solicitudes presentadas co fin de establecer unha prelación entre elas, de acordo cos criterios de valoración previamente fixados nas bases reguladoras e na convocatoria, e concederánselles co límite fixado na convocatoria, dentro do crédito dispoñible, a aquelas solicitudes que obteñan unha maior puntuación ao aplicar os criterios de valoración.

O importe das subvencións calcularase de acordo cos criterios de valoración recollidos nestas bases.

Establécese un importe máximo de subvención para as diferentes modalidades con base nos grupos e niveis das competicións segundo a seguinte clasificación:

Límites	
Competicións de nivel 1 Para os clubs que contan cun segundo equipo de categoría estatal incrementarase o límite establecido en 5.000,00 €.	Nivel 1-A.....35.000,00 €
	Nivel 1-B.....25.000,00 €
	Nivel 1-C.....15.000,00 €
Competicións de nivel 2	Nivel 2-A.....10.000,00 €
	Nivel 2-B.....5.000,00 €



Competicións de nivel 3	Nivel 3-A..... 20.000,00 €
	Nivel 3-B..... 10.000,00 €

En todo caso, as axudas non poderán superar o 40 % do orzamento presentado polas entidades coa solicitude.

Se ao facer o primeiro repartimento quedase diñeiro dispoñible, realizaranse tantas reparticións como fose necesario, seguindo o mesmo procedemento.

Quinta. Financiamento

A concesión das subvencións estará suxeita á dispoñibilidade orzamentaria e convocarase con cargo á aplicación 24/340.3410.489.20 do Orzamento da Deputación para o ano 2024 por un importe total de novecentos mil (900.000,00) euros.

En ningún caso a suma total das axudas concedidas poderá superar o orzamento máximo previsto nestas bases.

Sexta. Lugar de presentación de solicitudes

As solicitudes presentaranse obrigatoriamente por vía electrónica a través do formulario normalizado dispoñible na Sede electrónica da Deputación de Pontevedra, <https://sede.depo.gal>, de acordo co establecido no artigo 14.2 LPACAP.

Soamente se admitirá unha solicitude de subvención por cada entidade solicitante.

Para a presentación das solicitudes a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

Sétima. Prazo de presentación de solicitudes

O prazo de presentación de solicitudes será de vinte (20) días hábiles, contados a partir do día seguinte ao da publicación da convocatoria e do seu extracto no *Boletín Oficial da Provincia de Pontevedra* (BOPPO) e na Base de Datos Nacional de Subvencións (BDNS).



Oitava. Gastos subvencionables

Consideraranse gastos subvencionables aqueles que de maneira indubidable respondan á natureza da actividade subvencionada, resulten estritamente necesarios e se realicen durante o período correspondente á tempada 2023/2024, no caso de tempada partida, ou 2024, no caso de tempada anual.

Para os efectos destas bases, subvencionaranse os seguintes gastos de participación e adestramentos dos equipos e das e dos deportistas do club en competicións oficiais organizadas polas federacións correspondentes; estes son os seguintes:

- **Gastos federativos.** Os que correspondan a gastos emitidos polas federacións deportivas ou similares para a actividade deportiva subvencionada (licencias, arbitrxes, inscricións...)
- **Gastos de competición e adestramento.** Os correspondentes a desprazamentos, aloxamento, manutención, participación, alugueiro de instalacións deportivas, quilometraxe ou calquera outro necesario para asistir ou participar nas competicións ou adestramentos da actividade deportiva subvencionada.
- **Gastos de persoal.** Os que correspondan a soldos, salarios ou retribucións unicamente dos deportistas, técnicos, adestradores, ou calquera outro axente necesario para a práctica da actividade deportiva subvencionada.
- **Gasto de material deportivo.** Os que correspondan a vestimenta e equipamento deportivo non inventariable, así como a reparación e mantemento do material deportivo necesario para a práctica deportiva subvencionada.
- **Gastos sanitarios.** Os relacionados coa saúde das e dos deportistas no desenvolvemento da actividade deportiva subvencionada.

Outras normas para ter en conta:

- Quedan excluídos, entre outros, os gastos derivados de seguros, asesorías, telefonía, ITV, así coma calquera outro que non teña relación coa práctica da actividade deportiva subvencionada.



- En ningún caso se admitirán gastos cuxos prezos sexan superiores aos de mercado.
- Salvo disposición expresa en contrario, poderase considerar como gasto subvencionable o gasto feito e xustificado, aínda que non estea pagado, antes da presentación da xustificación, sempre que se pague no prazo máximo dun mes desde que se lle pague a subvención á persoa beneficiaria. Este aspecto comprobarase cando se faga o control financeiro.
- Non se considerarán gastos subvencionables os gastos que, superado o importe de novecentos (900,00) euros, non se paguen por medio de entidade financeira. Así mesmo, cando se trate de persoas beneficiarias que non conten con contabilidade, tampouco se considerarán subvencionables os gastos que non se paguen por medio de entidade financeira.
- En caso de que se subvencionen actividades non profesionais, servirá de xustificante o recibo no que se acredite a identificación da persoa beneficiaria da subvención e do suxeito que desempeña a actividade, o concepto, a data, o importe e o xustificante de que se realizou, se procede, a correspondente retención fiscal.
- En caso de compensacións por desprazamentos en vehículos privados, estableceranse sobre a base das tarifas aboadas por quilómetro con arranxo á normativa vixente.

Novena. Compatibilidade e incompatibilidade

A subvención será compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados.

Conforme ao disposto no artigo 19.3 da LXS, e no 17.3 da Lei 9/2007, de 13 de xuño, de subvencións de Galicia, no que se indica que "o importe das subvencións en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada".

A subvención será incompatible con calquera subvención para a mesma persoa beneficiaria e a mesma finalidade con cargo a créditos desta Deputación e os seus organismos dependentes, en especial, coas convocatorias de subvencións a clubs deportivos da provincia de Pontevedra de ámbito inferior ao estatal, ás de ámbito náutico e ás consignadas nominativamente no Orzamento para o ano 2024 da Deputación de Pontevedra.



Décima. Documentación

As entidades solicitantes presentarán, xunto coa solicitude, a seguinte documentación:

- **Certificado federativo (anexo I).** Certificación oficial expedida pola federación correspondente na que se detallen os criterios de valoración específicos e previstos nas bases.
 - Aqueles clubs de modalidades deportivas que desenvolvan a súa actividade competitiva en ano natural poderán presentar, xunto coa solicitude, unha declaración xurada na que se detallen os criterios de valoración específicos e previstos nas bases. En todo caso, deberán presentar o certificado federativo no prazo de dez (10) días desde a notificación da proposta de resolución provisional; en caso de presentar un menor número de licenzas, reducirase o importe da subvención proporcionalmente.

A documentación complementaria deberase presentar electronicamente. As persoas interesadas responsabilizaranse da veracidade dos documentos que acheguen. Excepcionalmente, a Administración poderá requirir a exhibición do documento orixinal para cotexalo coa copia electrónica presentada.

Se algunha das persoas interesadas presentase a documentación complementaria presencialmente, requiriráselle que a emende a través da súa presentación electrónica. Para este efecto, considerarase como data de presentación aquela na que se realizase a emenda.

Décimo primeira. Comprobación de datos

Para a tramitación deste procedemento consultarase automaticamente os datos incluídos nos documentos elaborados polas administracións públicas que se detallan a continuación:

- NIF das persoas xurídicas solicitantes.
- DNI ou NIE da persoa representante legal do club ou da entidade.
- Domicilio fiscal da entidade solicitante.
- Certificado de estar ao corrente das obrigas tributarias coa AEAT, coa Facenda Autonómica, coa Seguridade Social e coa Deputación de Pontevedra.



Se as persoas interesadas se opuxesen ás devanditas consultas, deberán indicalo no cadro correspondente habilitado no formulario de inicio e achegar os documentos correspondentes.

No suposto de imposibilidade material de obter o documento, o órgano competente poderá requirirle á persoa interesada a súa presentación ou, na súa falta, a acreditación por outros medios dos requisitos aos que se refire o documento antes de formular a proposta de resolución.

Décimo segunda. Notificacións

As notificacións de resolucións e actos administrativos realizaranse só por medios electrónicos, nos termos previstos na normativa reguladora do procedemento administrativo común. As notificacións practicaranse a través da Dirección Electrónica Habilitada única, accesible desde <https://sede.depo.gal> e <https://dehu.redsara.es>.

As notificacións entenderanse practicadas no momento no que se acceda ao seu contido e rexeitadas cando transcorran dez (10) días naturais desde a posta a disposición da notificación sen que se acceda a este.

O sistema remitiralles ás persoas interesadas avisos da posta a disposición das notificacións á conta de correo electrónico indicada na solicitude. Estes avisos non terán en ningún caso efectos de notificación practicada e a súa falta non impedirá que a notificación sexa considerada plenamente válida.

Se o envío da notificación electrónica non fose posible por problemas técnicos, a Deputación de Pontevedra realizará a notificación polos medios previstos na normativa reguladora do procedemento administrativo común.

Décimo terceira. Trámites administrativos posteriores á presentación de solicitudes e emenda destas

Se a solicitude non reunise os datos esixidos na convocatoria ou calquera dos previstos no artigo 66 da LPACAP, requiriráselle á persoa interesada, de conformidade co establecido no artigo 68 desta lei, que, nun prazo de dez (10) días hábiles, emende as faltas ou presente os documentos preceptivos, e indicaráselle que, en caso de non o facer, se terá por desistida a súa solicitude, que se arquivará sen máis trámites.



Todos os trámites administrativos que as persoas interesadas deban realizar durante a tramitación deste procedemento faranse por medios electrónicos a través do modelo "2887054 Trámites administrativos xenéricos distintos da solicitude", dispoñible en <https://sede.depo.gal>.

A Sede electrónica ten a disposición das persoas interesadas unha serie de modelos xenéricos que poden utilizar para realizar as xestións máis habituais durante a tramitación administrativa (representación, emenda á solicitude, alegacións, renuncia ou recursos, entre outros). Estes modelos son comúns para os distintos procedementos e poderán empregarse sempre que a normativa reguladora do procedemento concreto para o que se vaian usar non estableza outros modelos específicos. Os modelos xenéricos poderán descargarse para anexalos a unha solicitude ou para realizar trámites sobre outros expedientes e presentalos de forma electrónica ou presencial segundo a normativa reguladora do procedemento do que se trate. No formulario deberá indicarse, no seu caso, o procedemento para o que se está a realizar o trámite. Os modelos están dispoñibles en <https://sede.depo.gal/web/public/dynamic/catalogo/tramitesxenericos>

Décimo cuarta. Criterios de valoración e cálculo do importe das subvencións

Co obxecto de garantir unha valoración obxectiva para o cálculo dos importes, estableceranse os criterios do orzamento achegado coa solicitude e o certificado federativo (anexo I), de acordo coa seguinte ponderación:

Criterios de valoración específicos	Ponderación
Orzamento da finalidade subvencionada	50 %
Licenzas federativas	50 %
Total	100 %



Determinación dos puntos:

O procedemento para determinar os puntos acadados por cada entidade determinarase coa seguinte fórmula:

$$\text{Puntos de cada entidade} = (\text{Orz} * 50 / \text{Sto}) + (\text{Lf} * 50 / \text{Slf})$$

Orz: orzamento presentado

Sto: sumatorio total de orzamentos presentados

Lf: puntuación acadada polo club polas licenzas federativas do certificado federativo presentado

Slf: sumatorio das puntuacións totais dos puntos acadados polos clubs polas licenzas federativas

Cálculo da puntuación a través das licenzas federativas:

Licenzas totais da entidade	1 punto/licenza
Licenzas formativas (categorías base ata os 16 anos)	1 punto/licenza
Licenzas femininas	1 punto/licenza
Licenzas de deporte adaptado	10 puntos/licenza
Licenzas de técnicos ou adestradores:	
➤ Nivel 3	5 puntos/licenza
➤ Nivel 2	3 puntos/licenza
➤ Nivel 1	1 punto/licenza
Licenzas de técnicas ou adestradoras:	
➤ Nivel 3	7 puntos/licenza
➤ Nivel 2	5 puntos/licenza
➤ Nivel 1	3 punto/licenza
Licenzas estatais:	
➤ Competicións de nivel 1-A	600 puntos/licenza
➤ Competicións de nivel 1-B	500 puntos/licenza
➤ Competicións de nivel 1-C	400 puntos/licenza
➤ Competicións de nivel 2-A	200 puntos/licenza
➤ Competicións de nivel 2-B	100 punto/licenza
➤ Competicións de nivel 3-A	300 puntos/licenza
➤ Competicións de nivel 3-B	100 puntos/licenza



Cálculo do valor do punto das axudas das subvencións:

O valor do punto calcúlase dividindo o orzamento total destinado á convocatoria entre 100.

Cálculo do importe das subvencións

O importe final das subvencións calcularase multiplicando a puntuación acadada por cada entidade polo valor do punto das axudas.

Décimo quinta. Instrución do procedemento de resolución

A instrución do procedemento de concesión de subvencións correspóndelle ao Servizo de Deportes.

A instrución do procedemento de concesión comprenderá as seguintes fases:

- Estudo e comprobación de todas as solicitudes polo servizo instrutor, que realizará de oficio todas as actuacións que estime necesarias para a determinación, o coñecemento e a comprobación dos datos.
- Informe-proposta do xefe de servizo no que figure a valoración das solicitudes, de acordo cos criterios de concesión, explicando o sistema de valoración seguido e relacionando as solicitudes por orde e sinalando a subvención correspondente a cada unha delas. Así mesmo, relacionaranse as solicitudes desestimadas e explicaranse as razóns da súa desestimación.
- Informe-proposta por parte da comisión de valoración, que estará composta por:
 - Presidente: o xefe do Servizo de Deportes.
 - Vogais: un membro do persoal técnico do Servizo de Deportes.
 - Secretaria ou secretario: unha funcionaria ou funcionario do Servizo de Deportes.
- Proposta de resolución provisional. O órgano instrutor, á vista dos expedientes e do informe-proposta, formulará unha proposta de resolución provisional debidamente motivada, que será notificada coa súa publicación na Sede electrónica da Deputación de Pontevedra, e establecerase un período de dez (10) días naturais desde o mesmo día da



súa publicación para presentar alegacións, presentar o certificado federativo, de ser o caso, ou renunciar á subvención proposta.

- Proposta de resolución definitiva. Examinadas as alegacións ou os certificados federativos presentados e as posibles renuncias, formularase a proposta de resolución definitiva, que deberá expresar a persoa solicitante ou a relación de solicitantes para os que se propón a concesión da subvención e a súa contía. Tamén recollerá as solicitudes rexeitadas e os motivos do rexeitamento. As propostas de resolución provisional e definitiva non crean dereito ningún a favor da persoa beneficiaria proposta fronte á Administración, mentres non se lle notifique a resolución de concesión.
- Informe de fiscalización de Intervención de todos os expedientes e da proposta de resolución definitiva.

Décimo sexta. Resolución do procedemento

A proposta de resolución definitiva formulada polo órgano instrutor someterase á aprobación do órgano competente, que resolverá o procedemento.

O acto de resolución do procedemento publicarase no BOPPO e terá os efectos dunha notificación por tratarse dun procedemento de concorrencia competitiva (artigo 45 da LPACAP).

Así mesmo, serán igualmente publicados na páxina web da Deputación de Pontevedra.

O prazo máximo para resolver e notificar a resolución do procedemento non poderá exceder os seis (6) meses, contados a partir do día seguinte a aquel no que finalice o prazo de presentación das solicitudes. O vencemento do prazo máximo sen notificar a resolución lexítima as persoas interesadas para entender desestimada por silencio administrativo a solicitude de concesión da subvención.

Décimo sétima. Procedemento de xustificación e pago

As entidades beneficiarias das subvencións deberán xustificar o cumprimento da finalidade para a que se concedeu a subvención.

O prazo de presentación das xustificacións finalizará o 31 de xaneiro de 2025.



As entidades beneficiarias deberán presentar a xustificación obrigatoriamente por medios electrónicos segundo o previsto na base décimo terceira destas bases.

Para a xustificación as entidades beneficiarias deberán presentar a seguinte documentación:

- **Anexo II. Conta xustificativa de gastos e ingresos**

Na xustificación de gastos relacionaranse os conceptos de gastos por un importe igual ou superior ao orzamento presentado coa solicitude.

- En caso de que se xustifiquen gastos por un importe igual ou superior ao do orzamento presentado, aboarase a totalidade da subvención.
- En caso de que se xustifiquen gastos inferiores ao 100 % e igual ou superiores ao 50 % do orzamento presentado, aboarase a parte proporcional da subvención.
- En caso de que se xustifiquen gastos inferiores ao 50 % do orzamento presentado, non se considerará cumprida a finalidade básica da subvención, polo que non se aboará cantidade ningunha.
- Na conta xustificativa especificaranse as facturas presentadas para xustificar a subvención concedida, e declararase que esas facturas non se utilizaron para xustificar outras subvencións.
- En caso de necesitar relacionar máis facturas, utilizarase o documento de continuación da conta xustificativa (anexo III).

Na xustificación de ingresos relacionaranse as axudas concedidas por outros organismos públicos para a finalidade subvencionada e declararase que o importe das subvencións concedidas por outros organismos públicos e os fondos propios ou privados para a actividade subvencionada non superaron o importe total dos gastos para a dita actividade.

- En caso de que coa suma da subvención concedida e dos ingresos doutras subvencións ou axudas os clubs superen o custo da finalidade subvencionada ou obtivesen beneficios, aboarase a parte proporcional da subvención para que non se se supere o custo da actividade subvencionada.

- **Facturas ou documentos análogos** con valor probatorio no ámbito mercantil e administrativo só polo importe da subvención que se aboará.



- **Anexo IV.** Memoria na que se xustificuen as medidas de publicidade e difusión da subvención, por medio de fotografías que mostren de forma clara e inequívoca cada unha das actuacións requiridas.
 - En caso de que as entidades non xustificasen correctamente as medidas de publicidade e difusión, o Servizo de Deportes poderá establecer unha dedución máxima de ata o 15 % sobre o importe da subvención. Para a imposición destas deducións non fará falta tramitar un procedemento especial distinto ao da xustificación da subvención; o pago da subvención farase descontando o importe da dedución do importe concedido.
 - A falta de xustificación total das medidas de difusión dará lugar á perda total do dereito ao cobro da subvención.

- **Anexo V.** Nas modalidades deportivas nas que os equipos deban cumprir un mínimo de campionatos, estes terán que presentar este anexo asinado pola federación correspondente.
 - A falta de xustificación dará lugar á perda total do dereito ao cobro da subvención. Excepcionalmente, e debido a unha situación extraordinaria de suspensións dos calendarios de competicións, que imposibilite que a entidade complete os mínimos requiridos, a Deputación de Pontevedra poderá modificar os mínimos exixidos. As entidades deberán achegar xunto coa xustificación un certificado federativo no que se indique a suspensión ou o aprazamento das competicións e o motivo.

Outras normas que se deben ter en conta na xustificación:

- A desviación máxima no custo dos diferentes conceptos da actividade subvencionada con respecto ao orzamento inicial pormenorizado será dun 20 %. Todo gasto que supere este límite non se considerará subvencionable.
- Os gastos presentados na conta xustificativa deben estar pagados ás súas respectivas provedoras e provedores antes de presentar a xustificación da subvención. En caso de que o club non dispoña de fondos nese momento, terá un prazo máximo dun (1) mes desde que perciba a subvención para efectuar eses pagos. Se posteriormente, mediante control financeiro, se comprobase que algún dos gastos non se pagou ou se fixo fóra de prazo, este deixará de ser subvencionable.



- As entidades beneficiarias das subvencións provinciais deben empregar, con carácter xeral, formas de pago a terceiras persoas que poidan acreditarse mediante un documento expedido por unha entidade financeira no que queden identificados a ou o beneficiario, o importe e a data de pago (tarxetas bancarias de crédito ou débito, talóns nominativos, transferencias bancarias etc.), e só excepcionalmente poderá empregarse o pago en metálico cando non sexa posible outra forma alternativa. O incumprimento desta disposición para algún gasto que supere o importe de novecentos (900,00) euros implicará que este se considere non subvencionable.
- En caso de clubs que non teñan contabilidade, os gastos que non se paguen mediante unha entidade financeira non se considerarán subvencionables.
- Unha vez vencido o prazo de xustificación sinalado nestas bases ou, no seu caso, o establecido na prórroga sen que a entidade beneficiaria presente a documentación xustificativa, o Servizo de Deportes requiriralle que o faga no prazo improrrogable de quince (15) días. Pasado este prazo sen que a entidade interesada atenda o requirimento, entenderase que renuncia á subvención, e ditarase a resolución de perda do dereito ao cobro, que será notificada á entidade beneficiaria.

O pago das subvencións farase unha vez aprobada a xustificación, mediante transferencia bancaria á conta sinalada pola entidade.

Para cobrar a subvención, os clubs deberán estar ao corrente das súas obrigas tributarias coa AEAT, coa Facenda galega, coa Seguridade Social e coa Deputación de Pontevedra.



Décimo oitava. Medidas de publicidade e difusión

As entidades beneficiarias destas axudas deberán levar a cabo as seguintes actuacións en materia de difusión e publicidade:

- 1) No equipamento oficial de competición do equipo polo que accede á subvención (o incumprimento podería implicar unha dedución de ata o 10 % da subvención concedida):

Subvencións por un importe superior a 10.000,00 €

- Será obrigatorio incorporar o logo da Deputación de Pontevedra no equipamento de competición (camiseta ou similar) nun lugar visible e na parte dianteira; esta deberá ter unha medida estándar de 25 x 8 cm.

Subvencións por importe de 5.000 a 10.000,00 €

- Será obrigatorio incorporar o logo da Deputación de Pontevedra no equipamento de competición (camiseta ou similar) nun lugar visible e preferiblemente na parte dianteira; esta deberá ter unha medida mínima de 25 x 8 cm.

Subvencións por importes inferiores a 5.000,00 €

- Será obrigatorio incluír o logo da Deputación de Pontevedra no equipamento (camisetas ou pantalóns) de competición oficiais, nun lugar visible e cunha medida estándar de 10 x 5 cm.

- 2) No equipamento oficial de competición do resto de equipos pertencentes ao club (o incumprimento podería implicar unha dedución de ata o 5 % da subvención concedida):

Subvencións por un importe superior a 10.000,00 €

- Será obrigatorio incorporar o logo da Deputación de Pontevedra no equipamento de competición do resto de categorías ou equipos do club nun lugar visible e unha medida estándar de 10 x 5 cm.

Subvencións por importe de 5.000 a 10.000,00 €

- Será obrigatorio incorporar o logo da Deputación de Pontevedra no equipamento de competición do resto de categorías ou equipos do club nun lugar visible.

Subvencións por importes inferiores a 5.000,00 €

- Será obrigatorio incorporar o logo da Deputación de Pontevedra no equipamento de competición do resto de categorías ou equipos do club nun lugar visible.



- 3) En equipamentos de adestramento (o incumprimento podería implicar unha dedución de ata o 3 % da subvención concedida):

Subvencións por un importe superior a 10.000,00 €

- Será obrigatorio incorporar o logo da Deputación de Pontevedra no equipamento de adestramento (camiseta, suadoiro ou similar) nun lugar visible; esta deberá ter unha medida estándar de 25 x 8 cm.

Subvencións por importe de 5.000 a 10.000,00 €

- Será obrigatorio incorporar o logo da Deputación de Pontevedra; se estivese presente calquera outra Administración, esta irá de forma proporcional ao resto de administracións.

Subvencións por importes inferiores a 5.000,00 €

- Será obrigatorio incorporar o logo da Deputación de Pontevedra; se estivese presente calquera outra Administración, esta irá de forma proporcional ao resto de administracións.

- 4) En roupa e equipamentos de viaxe (o incumprimento podería implicar unha dedución de ata o 3 % da subvención concedida):

Subvencións por un importe superior a 10.000,00 €

- Será obrigatorio incorporar o logo da Deputación de Pontevedra na roupa e equipamentos de viaxe nun lugar visible; esta deberá ter unha medida estándar de 10 x 5 cm.

Subvencións por importe de 5.000 a 10.000,00 €

- Será obrigatorio incorporar o logo da Deputación de Pontevedra; se estivese presente calquera outra Administración, esta irá de forma proporcional ao resto de administracións.

Subvencións por importes inferiores a 5.000,00 €

- Será obrigatorio incorporar o logo da Deputación de Pontevedra; se estivese presente calquera outra Administración, esta irá de forma proporcional ao resto de administracións.

- 5) En lonas publicitarias na instalación das competicións (o incumprimento podería implicar unha dedución de ata o 5 % da subvención concedida):

Subvencións por un importe superior a 10.000 €



- Será obrigatorio incorporar catro pancartas coa imaxe corporativa da Deputación nun lugar visible e cun tamaño mínimo de 5 x 1 m (recoméndase unha en cada fondo e unha en cada lateral).

Subvencións por importe de 5.000 a 10.000 €

- Será obrigatorio incorporar dúas pancartas coa imaxe corporativa da Deputación nun lugar visible e cun tamaño mínimo de 5 x 1 m (recoméndase unha en cada fondo).

Subvencións por importes inferiores a 5.000 €

- Será obrigatorio incorporar unha pancarta coa imaxe corporativa da Deputación nun lugar visible e cun tamaño mínimo de 5 x 1 m.

6) Outras medidas que se deben ter en conta, de ser o caso (o seu incumprimento podería implicar unha dedución de ata o 5 % da subvención concedida):

- Vehículos oficiais do club. Todas as entidades que dispoñan dun vehículo oficial do club deberán incorporar a imaxe da Deputación de Pontevedra nun lugar visible e de forma proporcional ao resto de administracións.
- Carteis oficiais. Todas as entidades que leven a cabo carteis oficiais deberán incorporar a imaxe corporativa da Deputación nun lugar visible e de forma proporcional ao resto de administracións, tanto en tamaño coma en cantidade.
- Paneis traseiros para eventos ou actos do club, coma conferencias de prensa, presentacións, comunicacións ou premios. Todas as entidades que leven a cabo estas accións deberán incluír a imaxe corporativa da Deputación nun lugar visible e de forma proporcional ao resto de administracións, tanto en tamaño coma en cantidade.
- Espazo dixital do club (páxinas web e redes sociais). Todas as entidades que leven a cabo estas accións deberán incorporar a imaxe corporativa da Deputación nas cabeceiras ou nos apartados de colaboradores ou patrocinadores das entidades. Nas redes sociais será obrigatorio aparecer nas cabeceiras ou fotos de perfil. As entidades deberán nomear a Deputación sempre que se etiquete o resto de entidades ou administracións colaboradoras.
- Outros soportes publicitarios. En caso de que as entidades realicen outras accións ou medidas publicitarias como retransmisións en directo, colocación de pantallas LED na pista ou calquera outra deberán incorporar a imaxe corporativa da Deputación nun lugar visible e de forma proporcional ao resto de administracións, tanto en tamaño coma en cantidade.



As subvencións de menos de mil cincocentos (1.500,00) euros só terán que xustificar a difusión por medio de algún dos apartados anteriormente citados.

Todos os gastos derivados da produción dos elementos publicitarios mencionados correrán a cargo da entidade subvencionada, que se compromete a actualizar todos estes soportes publicitarios antes de presentar a xustificación.

De non incluír a imaxe da Deputación de Pontevedra nos termos establecidos, debido ás características da modalidade deportiva ou de calquera outra circunstancia, deberase propoñer unha alternativa, que será estudada polo Servizo de Deportes, para posteriormente propoñer a súa aprobación ou unha dedución da subvención.

A Deputación de Pontevedra poñerá á disposición das entidades subvencionadas os logotipos oficiais da imaxe corporativa en www.depo.gal (área de descargas).

As entidades solicitantes deberán ter en conta para futuras actuacións estas medidas de difusión á hora de deseñar novos equipamentos ou calquera outra medida.

Décimo novena. Obrigas das entidades beneficiarias

Ademais das obrigas previstas no artigo 14 da LXS, as entidades beneficiarias terán que cumprir o seguinte:

- As medidas de publicidade e difusión nos termos regulamentariamente establecidos nestas bases.
- Os demais supostos previstos nesta normativa reguladora das subvencións.
- As entidades beneficiarias deberán aprobar a liquidación da tempada. O acordo deberá ser aprobado pola asemblea ou órgano competente da entidade deportiva e referirse de xeito expreso no acordo, e con carácter mínimo, o importe total dos gastos, o importe total de ingresos e o resultado da tempada. Ao abeiro do disposto no artigo 56 da LXS, o incumprimento desta obriga formal será considerado como infracción leve, comprobación que se realizará posteriormente no caso dun control financeiro.



Vixésima. Reintegro ou perda do dereito ao cobro da subvención

As subvencións concedidas deberán reintegrarse cando as causas sexan posteriores ao pagamento destas.

Perderase o dereito a cobrar a subvención, total ou parcialmente, no suposto de falta de xustificación ou de concorrencia dalgunha das causas previstas na lexislación de subvencións e, en concreto, nos seguintes supostos:

- Por incumprir as obrigas establecidas con motivo da concesión da subvención.
- Por incumprir as obrigas de xustificación.
- Por incumprir as obrigas de adoptar medidas de difusión do financiamento público recibida.
- Polas demais causas establecidas na normativa de subvencións.

Vixésimo primeira. Control financeiro

O beneficiario, de acordo co establecido nos apartados 5 e 6 do artigo 31 da Ordenanza xeral de subvencións da Deputación, publicada no BOPPO núm. 249, de 30 de decembro de 2016, estará suxeito ao control financeiro que se poida exercer, no prazo de catro (4) anos, contados desde o pago da subvención, e indicaráselle que, en caso de non ter contabilidade fiable, só serán subvencionables os gastos que se poidan acreditar mediante extractos bancarios (independentemente do importe destes).

O control financeiro fará referencia a todos os gastos e ingresos da actividade subvencionada, que deberá integrar a totalidade de gastos finais resultantes dos gastos subvencionables presentado coa solicitude, así como o resto de gastos que a entidade estime imputables á tempada (posibles gastos que non se reflicten na solicitude).

Esta contabilidade deberá estar reflectida nos libros contables coa totalidade de gastos e de ingresos; en caso de ser positiva, a entidade deberá reintegrar o importe resultante, conforme á lexislación vixente, que indica que o importe das subvencións en ningún caso poderá ser de



tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada.

É importante determinar o inicio e finalización da tempada e os gastos e ingresos que se lle imputan, especialmente en caso de que existan outras actividades complementarias, compatibles co seu obxecto social, de carácter industrial, comercial ou de servizos e destinar os seus bens ou recursos a estes obxectivos (como poden ser escolas deportivas, eventos, campus deportivos...). Estas actividades deberán reflectirse nos libros contables de maneira independente e, en caso de que a entidade presentase un balance anual positivo, debe quedar reflectido en que actividade se imputa ese superávit.

Vixésimo segunda. Órgano de aprobación

De acordo co establecido na base 16.2 das Bases de execución do Orzamento para o ano 2024 e cumprindo o establecido no artigo 18 da LXS, o órgano competente para a aprobación destas bases é a Xunta de Goberno.

Vixésimo terceira. Dereito supletorio

Para o non disposto nestas bases contemplárase o establecido no artigo 4 da Ordenanza xeral de subvencións da Deputación de Pontevedra.

Vixésimo cuarta. Recursos

Contra estas bases e as resolucións administrativas que se adopten na súa execución poderá interpoñerse, no prazo dun (1) mes, un recurso de reposición ante o órgano que as ditase, que se entenderá como desestimado se transcorre este período sen recibir contestación. Neste caso poderá interpoñerse no prazo de dous (2) meses un recurso contencioso-administrativo perante o Xulgado do Contencioso-Administrativo, como se prevé no artigo 8 da Lei 29/1998, de 13 de xullo, da xurisdición contencioso-administrativa. Contra esta resolución tamén se poderá interpoñer directamente un recurso contencioso-administrativo no prazo indicado.



En todos os casos os prazos contaránse a partir do día seguinte ao da recepción da correspondente notificación ou da data na que o recurso de reposición se entenda como desestimado.

Vixésimo quinta. Publicidade da convocatoria

Estas bases reguladoras publicaranse no BOPPO e en <https://sede.depo.gal>.

Por outra banda, de conformidade co previsto nos artigos 17.3.b e 20.8.a da LXS, remitiráselle o texto da convocatoria á BDNS para a súa publicación nela, que será a que lle dea traslado do seu extracto ao BOPPO.

Vixésimo sexta. Protección de datos

Os datos persoais obtidos neste procedemento serán obxecto de tratamento pola Deputación de Pontevedra, en calidade de órgano responsable, coa finalidade de xestionar este procedemento, verificar os datos e os documentos que a persoa interesada declare na súa solicitude para comprobar a súa exactitude e levar a cabo todas as actuacións administrativas que, no seu caso, deriven.

A lexitimación para o tratamento baséase no cumprimento dunha tarefa en interese público ou no exercicio de poderes públicos segundo as normas de rango legal recollidas no apartado “Normativa aplicable”, dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario para que a cidadanía poida acceder de forma integral á información relativa a unha materia e ao público xeral dada a publicación de actos prevista.

As persoas interesadas poderán acceder, rectificar e suprimir os seus datos, así como exercer outros dereitos ou revogar o consentimento segundo o previsto en <https://depo.gal/proteccion-de-datos/exercicio-de-dereitos>.

